



憶記卷之三

長永部
振聲西
諸子志

淮南吳牲著

○上遣內員駐保定管理開礦事務委關監數人至晉不擾動民

間募商為之子檄州縣察開礦狀知神廟時採取已竭所獲無多

而晉中餘孽未靖慮聚眾滋亂乃具疏列十不便狀末云即使利

害相半值此時艱尚憂釀禍况害十而利未必一乎宜速罷內遣

以安危地上命督礦務者酌覈具奏久之果如子言遂報罷

○戶部議稅間架雖比唐法稍輕而擾民賈怨則均子具疏援陸



懷言卷三
贄諫唐德宗事內云陞投下投珠抵壁上希堯舜當事者故固不當以德宗敝政進而朝廷之上無一陸贄其人臣深以為恥願概賜停止非獨為三晉災民請命已也不報

○提學道僉事袁繼成以臺員謫官立朝疏奏素著風采提學山西以民教為己任操履皜然課士公明秋闈得人最多子遵旨提學官三年清公有望者間擢五品京堂以示優異乃疏薦繼成宜照旨優擢會稿按院不畫題然子疏已拜矣已始知數日前按院批遺才諸生狀令繼成取送入場繼成曰考送諸生本道事也可

以按院批狀行乎嚴斥諸生按院聞之大怒且具疏參論捏諸賍款汙蔑之矣按院曾為歸安令夤緣烏程改授御史差山西知子與繼成皆烏程所忌欲參繼成傾予以媚烏程其疏奉旨甚嚴袁繼成革職拿解來京究問賍証諸犯即着該按審擬具奏繼成貪婪如此撫臣何得濫薦着自行回奏按院密屬司理謁子云回奏疏略自引咎渠與烏程相知可為言不過降級了事耳子曰皇天白日可令姓賣繼成以欺吾君父乎退而具疏直陳按院臣徇私囑托繼成抗直不阿狀且云繼成既已解京一訊自明而証犯着

懷壽卷三
該按審擬羅織文致何所不致乞教一併解京如果犯贓有據甘與繼成同罪得旨知道了証犯一併解刑部訊明奏奪按院見之咋舌銜恨益深

○子四品俸通前左通政已滿三年上疏自劾上優答特念危疆勞吏准考滿父贈中憲大夫巡撫山西僉都御史母贈恭人妻贈恭人

○袁繼成攜一僕赴京子捐俸贈之路費曰敢以清俸用佐廉儉繼成辭不受諸生泣送於途汾州孝廉曹良直為執鞭弭送至京

邱范廷輔語子云袁僉事臨行簡行囊止兩破籠內同鄉送行銀盃二器舊員領數套書數本而已此外併無長物學租皆發賑貧生及置買學田其清如此

○建唐狄文惠公仁傑祠於太原之城南立碑為文祀之額其堂曰斗南一人

○張按院閱邊州縣皆餽以馬騾鞍韉刀劍等物又五日小送備極珍奇有司苦之至邊摘論動移邊丁月餉三千及侵用撫賞銀兩等事奉旨該撫察明具奏子察動移邊丁三千乃前撫宋統殷

勤賊疏請邊丁未復調用動其空月餉銀三千給猛如虎等兵糧後如虎補太原營空餉仍還該營募軍矣撫賞停罷已久所稱動用乃前監視內臣劉允中督勦邊賊時那借給兵有款項可以追補非侵用也按臣不明言某年某官而泛指該撫動移該撫侵用特因前袁繼成事相忤借以陷臣云

○子防河所歷各縣詢巡按出巡行事有司攢眉每縣拿訪數千起皆書辦承差捏開不係司理縣官開送者省會拿至五六十起小民驚歎案未問結日差承役票取賍至累萬子竊歎曰子辛苦

勤數年為天子撫惠元元况可小康而貪人敗類致窮民破家產有司動錢糧那解賍贖子避嫌不言謂地方何乃具疏指實糾按臣貪橫諸狀旨下都察院都察院言御史犯賍不可不一嚴察遂得旨拿解來京究問晉之吏民皆加額曰今始睹天日矣

○子以諸賊渠魁屢經擒戮餘孽未靖宜開一面乃行榆次汾陽等縣入山招撫降者甚眾詢其鄉井給道里費押送該縣責令其親族里圖安插得所數月各處報安撫者萬二千餘人黨與解散者不知其數也間有怙惡者發兵追勦次第就擒山西盜平

○子數素弱有吐血症曩在滋州時公務愆冗曾一舉發至是益甚始杜門拜疏請告云晉中盜賊賴陛下威德皆已撲滅共計二年以來斬級六千有奇安撫過萬二千餘人解散遁歸陝西原籍者不下數萬幸蕩平矣臣抱病已久逆賊未滅何以生為臣不敢遽瀆聖聽臣乃今始敢以病狀請溝壑不允

○甯武總兵王忠領兵援豫病不能督戰兵無餉一日潰散渡河歸子恐沿途搶掠遺患地方乃遣官招撫之曰邊備急本院原疏請撤兵歸營爾等各照隊令領兵官押回原伍經過地方量給糧

犒毋得擾掠取罪各兵初謀入山為盜見差官至始安將至省子復差官犒以羊酒令領兵官入見責之曰主帥即病爾等非領兵頭目乎誰倡逃者領兵官直陳某隊某某原係降丁不過十餘人且謀入山為盜各官調停諭以本院德意乃止今各隊皆怨此數人入骨子手書檄付之曰爾可擒解此數人餘俱不問仍歸伍可也領兵官果擒獲解院子疏請倡逃者已獲宜正法餘令歸伍上從之

○袁繼成至京諸証犯皆背黃鳴冤諸上公車貢士具疏訟繼成

刑部訊實按疏皆誣大司寇鄭三俊擬繼成杖還職上曰朕知繼成寬免杖送吏部陞授應得職銜乃除湖廣武昌道副使子聞之遺手書勸以病辭且歸省老親繼成曰主恩渥矣敢不捐軀以報

○上篤親親誼頒宗儀比常行儀倍加隆重晉中惟晉王賢汾州平陽諸郡藩驕橫凌爍有司潞州藩藩一郡王赴京挾奏知府焦浴子疏以聞郡王祖制不許出城况入京挾奏乎請遵典制裁抑之旨下禮部覆奏解發鳳陽高牆自是驕橫稍戢

○上欲掄才宗室許藩王薦舉撫按覈實移部換授無知輩遂乘傳赴京紛紛上疏子疏言宗室果有才能當遵旨靜候薦覈今乘傳傳餐金扇黃蓋招搖道路恐奸邪不逞之徒妄生異心未得為用先釀其禍上悟始令該部嚴覈不可用者發回不可聚集京師

○監視內員牛文炳借巡歷為名索取州縣餽遺不貲至澤州激變小民幾蹈不測無所洩忿乃疏參署州印潞安府推官靳聖居革職提問子疏言內臣激變小民事起倉卒靳聖居勸諭旋就解散不當革職提問卒從降調久之監視亦撤

○子病甚不飲食者旬日幾不起丁丑年十月初一日得請益前

後十五疏云

○子撫晉三年而督勦在行間者二年凡賞功級銀兩皆取之公費贖錢及藩司庫貯雜稅等銀不動公幣一錢所留新餉共支動七萬有零耳事完一一造冊報銷不知各省動餉輒以數百萬計何說也自萬厯末年熊廷弼撫遼時加派遼餉四百餘萬楊嗣昌督勦流寇又加派勦練二餉八百餘萬雜項事例不下百萬比國初賦額三倍之民力已竭上諭近臣曰賊寇未平小民加派何時可已為之流涕

○戊寅三月報陞兵部右侍郎子病苦餘生十五疏始獲歸休藥爐未燼而朝除忽及義無出理乃拜疏懇辭道路修阻動輒數月至八月終將進第三疏而兵部尚書楊嗣昌第二機宜疏言樞務殷煩侍郎吳甦惠世揚久不赴任宜懸缺就近推補奉旨聞住○子構屋數椽西城仙源紫菴菴先生昇仙處築一小樓坐其上讀書不輟因自號紫菴

○庚辰十二月會推兵部左侍郎子不獲辭以辛巳二月赴京四月見朝到兵部任故事部務總尚書一人裁決左右侍郎坐議畫

題而已崇禎時機務百倍往日上精心省覽留意軍情即日覆奏一夕數至寫本吏二十人晝夜繕寫猶不暇給乃以班軍捕盜襲替騰黃考試武生等事分屬左右侍郎管理子日入部署料理不敢以故套視也然考之舊制強半後來紛更失原旨矣

○辛巳八月上視學行釋菜禮幸彝倫堂祭酒司業以次坐講畢駕閱城東北角樓樓新報落成也兵部堂上官得騎馬護駕上御角樓賜護從各官瓜果閣臣等同入謝上諭閣臣曰大儒周二程張朱邵六子有功聖道與從祀諸賢不同宜議優崇卿等傳與禮

部子退而具表章真儒疏請命詞臣輯政正六子全書頒之學宮報可

○時京城外築土垣亘東南一帶下濬河與會通河接出司禮監太監曹化淳議例撥班軍修築立限嚴迫司官四員寢食其下督工內監時時凌厲加以聲色左侍郎五六日一至工所覈催子初至見土垣迫近京城有警須用多兵防守不則反為敵據非勝算也且東南一帶土多沙石築已遇雨輒傾以有限之物力供難堅之冗工况京師龍氣所聚穿河非宜何乃罪地脉哉上疏請將東

北已成者旦夕報完外其餘乞賜停罷奉旨是

○永樂既都北京令山東河南江北諸郡衛所各軍春秋兩班赴京部科點驗發京營一體操練以習軍士之勞省徵調之煩壯京師之衛備邊隘之防法甚善也其後分發近邊築工折其半納班價矣又其後皇親駙馬侯伯有墳土輒乞恩請班軍以數千計皆折價入橐矣領班官歲斂軍士金錢入京募人應點本軍遂不赴京大失祖宗之意崇禎末年流寇紛起上屢行停免而地方殘破軍人十亡八九

○是歲吾郡旱災民饑子具疏請蠲停逋賦報可十月敘山西勦寇功加陞一級賞銀三十兩四表裏廕一子入監讀書子疏辭言山西平賊出朝廷威德與將士之力今猛如虎虎大威等戮力封疆皆已戰亡未蒙卹錄之典而臣獨冒隆恩乞允辭免上免其陞級餘着祇受不准辭

○十一月改戎政協理京營京營軍十二萬以六副將及參遊等官分領之舊習相沿皆京城菜傭市獐買糧代替者難驟革也內有邊勇營始議募邊丁優其糧犒可以禦侮久之將領以家丁充

數及近畿人用賄入旌旗器甲非不燦然可觀然承平久從未見敵不足恃也

○冬至上祀南郊賜兵部尚書侍郎糖盒各一內凡九種皆禁中所製酥食也

○勇衛營在京營北內員統領兵近二萬器甲旗幟煥然飾觀而已

○召對發兵總督協理奏訖提督太監王德化亦奏言京營馬匹不滿萬又多瘦弱不便發勦語未畢上目攝之曰此非爾奏事處

德化惶懼而退是晚上手諭下閣罷提督矣上英斷如此

○壬午四月召對上問京營兵內欲選五萬堪戰之兵汰去老弱兵在精不在多將何以選練而使之精使汰者不譁乎臣姓對言汰老弱之法即在練精壯之中數月來臣已稍稍有成緒矣京營原募邊勇營一萬二千專練騎射月支米一石鹽菜銀一兩又有壯丁營專練火器者二萬月支米一石銀六錢其餘皆月支米一石無鹽菜也近驗邊勇壯丁與散兵無異騎射火器亦未精熟臣嘗責各將領曰糧分厚薄而兵無強壯何以服衆軍士之心乎今

後行分練法各將領日練騎射火器精熟而力舉三百觔以外者
另列名籍旬日呈總協合操之騎射勇力如式者雖散兵拔為邊
勇不則邊勇降為散兵壯丁亦然若老弱不堪自當革退另選精
勇者補伍行之數月選練者十之二三汰去者亦十之二三此法
嘗行軍士心服皆鼓厲練習以圖厚糈而被汰者亦無怨色革弊
當以漸不可使知有汰兵之意上傾聽至此笑曰說得極是極是
又問果當另立戰營得堪戰者五萬否姓對京營設兵原期人人
堪戰因積弊相沿又承平日久不見戰陣者數百年即前此間或

發兵勦賊皆沿路無藉遊棍代頂本軍正身并未出京一步將領
利扣其糧犒遊棍利恣其擾搶節敗為功冒功濫賞歸營則本軍
依舊充伍代頂者復沿路散亡此積弊已久無逃聖鑑今依臣練
法最要尤在選將有戰將自有戰兵五萬亦不為難但法須易簡
事忌紛更不必另立戰營也上諭兵部曰協理說得是卿速選戰
將不可悠忽又諭臣姓曰還具疏條陳來看賜果餅拜謝而出子
嘗問首輔宜興曰井研有密揭意欲另立戰營久留任兄選練耳
不料奏對明妥大當上意也

○壬午五月枚卜內閣張四知謝陞魏照乘前後罷賀逢聖以老賜歸里止宜興井研在閣故復下枚卜之旨吏部尚書李日宣初會推九人外任者三子與鄭玄岳三俊劉念臺宗周也奉旨再推幾推員來看後又推八員

○六月二十一日上御中極殿輔臣賀逢聖面辭賜宴恩意隆渥逢聖拜謝奏臣老恐不復再覩天顏涕泣而出上召對枚卜諸臣問勦寇裕餉何策而可蔣德璟等以次奏對至臣姓對大略言勦寇裕餉須從本原簡易處講求治理堯舜之世未嘗無蠻彝盜賊

奸宄而至治之要止曰知人安民知人則哲能官人官得其人內而閣部外而督撫鎮道以及守令天工人代庶事成熙則民自安是知人又安民之本也陛下厲精圖治宵旰不遑亦嘗講求官人之術矣而卒未得人政事煩苛求治愈急規却愈甚有司煩征重斂貪虐小民上干天怒結為災沴水旱洊臻盜賊日熾勢不得不**用兵用兵勢不得不加餉加餉勢不得不徵斂盜愈多而餉愈乏**職此之繇陛下如反求之本原操以簡易閣部得人以致督撫鎮道守令莫不得人政和事理天表之應水旱不作則盜賊不生盜

賊不生則地方不復用兵地方不用兵則可無事加派徵斂此息盜之原足食之本也若募天下之民以為兵斂天下之財以為餉竭澤焚原非策之得臣惟願聖明於知人安民留之意而已上佇聽諭曰起來姓退復班諸臣退訖俱叩頭出閣臣留少選亦出知上已簡用三人予亦與焉次日旨下將蔣德璟黃景昉吳姓俱陞禮部尚書兼東閣大學士入閣辦事

○文淵閣在午門之東初僅五間崇禎時閣員獨多改七間為閣各輔臣分票之房中一間上供

孔聖人畫像傳是宣德朝所賜出也近窗處東西列二長櫬諸輔臣進揖 聖人以次對坐中置長棹凡分本及分票完首輔與諸輔參酌於此坐他不得與往時堂饌會食近止月朔日相輪一會而已翰林院官皆在堂內揖不坐故稱內閣中堂老先生云會極門之南廊廡一間坐東向西額曰東閣經筵日講退講官至日揖光祿官至此奉茶而別其餘各官在外則朝房見進朝則或班房見此惟部院堂上官有機務相商者則然內閣晚輪一人宿朝房以不時發本票擬也上又於午門外西廊房修理一處遇冬寒則

輪宿於此以去內朝更近發本擬旨更速也屢朝賜出書籍俱藏閣中書目甚多所謂中秘書也予簡閱多遺缺無部者聞文楊文忠廷和在閣時其子慎衣家人衣進閣校書所著述編輯獨稱博云

○洪武誅胡惟庸後不置丞相政歸六曹裁決皆出睿斷永樂時始命解縉等七人直文淵閣掌制誥參機務此票擬之始迨後內外兼用部院卿貳亦得入閣然皆首輔為政次輔以下參末議而已屢朝熙洽機務簡要閣無多員且任久至崇禎初上懲魏璫專

擅事事總攬羽書告急日不暇給上精明票旨詳晰或不當上意輒發改又多勅諭即日撰進無舊案可攷證始議分票票簽末書臣某謹擬然內閣之職專司票擬云

○內閣自永樂至天啟末年二百三十餘年閣員共八十餘員今上臨御甫十五年更置已幾三十人才固不及古而國事多艱亦可以徵時變矣

○壬午七月上手勅復黃道周官先是少詹黃道周疏參楊嗣昌奪情入閣上召對道周援古糾正愈力上怒道周曰臣忝在侍從

知而不言是臣負陛下陛下不聽而殺臣是陛下負臣上心知道周直乃謫官降江西三司首領去逾一年江西巡撫解學龍陞南京兵部右郎侍疏薦道周內有身任細常之重等語上大怒逮學龍併道周到京午門外各廷杖八十發錦衣衛嚴訊刑部主事葉廷秀疏言不宜廷杖詔獄亦繫刑部葉山東濮州人素與道周不識面特為義激耳自是朝廷之上皆搖手噤舌不敢開口出一言內閣皆謂上欲殺道周庚辰四月子抵京始冒言明主可與忠言雷霆無竟日之怒道周等不過愚戇偶批逆鱗上豈有意殺之為

人臣又在九卿之列當委曲開導豈可遂成主上過舉見內閣輒言之公論稍稍伸至辛巳十月宜興入問子今最急當入告者何事子言自韓城在閣皆嚴刻繩下致主上疑猜日甚黃道周解學龍逮繫兩年餘痛楚備嘗然果何罪哉今內閣諸公皆言上欲殺之愚獨謂英明之主斷不肯有殺直臣名公到上信任甚篤宜乘間以至誠感動佐聖主行寬大之政此為最急務矣宜興曰俟從容圖之然刑部爰書亦宜着意時河南劉澤深為司寇子往謁之為言道周一案宜從寬擬且激以古人大義劉曰名義至重敢不

竭力各擬邊戍上初不允劉再疏力持上始允部議道周永遠學
龍極邊廷秀邊遠各充軍辛巳十二月也至壬午七月上日講畢
偶發問而講官不能對上言博聞強記亦甚難將德璟奏言往日
臣所見惟黃道周讀書博洽今蒙恩永戍家貧幼子幼恐死道路
乞皇上念其清苦稍移近地周延儒奏言道周愚戇書生遣戍不
過主上懲創之意久當復用何必又移近地乎臣牲奏道周刻勵
清勤學問淵博皇上聖學緝熙經筵講幄必得如道周者左右備
顧問足資啟沃今諸臣才品皆不及也上微笑不言至暮而手勅

復道周官一時縉紳歡聲雷動解葉行當賜環臺省不知屢疏引
薦上疑其市恩不行

○山東盜賊充斥漕運艱阻史可法殫力精勤在淮晝夜督漕猶
虞虞不繼上海憂之臣牲奏言裕餉之策莫善屯田計歲所入可
佐漕糧之乏蘇歲運之苦古人謂築堡砦廣溝塍種榆柳亦可佐
邊防資守望上喜曰傳與吏戶兩部知道

○上一日袖潞河客談一冊諭閣臣曰先臣所言屯事最悉當照
此行今誰可督此者臣牲奏言屯田初行督理須用重臣置官屬

假便宜需之歲月乃有成效以臣所知袁繼成庶能任事若起之
戎所命為督理屯田僉都御史後來必有可觀上詔吏部會推復
用繼成繼成先是巡撫鄖陽未幾襄陽為賊攻陷總兵左良玉領
兵遁避兵部議良玉方領重兵乃止降二級戴罪而逮繼成擬邊
戎然上知其才終用之

○畿南是秋熟一日臣奏言近畿豐稔穀價甚賤似應發金責該
撫糶穀貯倉備屯田種子之用上善之發御前銀十萬兩諭戶部
解發該撫糶穀備屯田種

○八月初一日傳朝朝既盈矣及辰上以腹痛復傳免內閣具揭
恭候萬安中寓謹疾勤政之意上賜諭褒嘉之

○上改慈慶宮為端本宮一日諭內閣曰擇日令太子出居此臣
牲奏言慈慶去東華門不遠昔皇考為東宮時所舊居也挺擊至
今疑案亦以此宮孤懸在外微欠嚴邃耳今東宮殿下幼冲正宜
定省左右親承聖教似未可出居外宮且天氣漸寒即聖意已定
亦少俟明春歲和之後上曰既如此俟春和可出而宜興井研恠
子多言子曰公不見泰昌已事乎

憶記卷之三

憶記卷之四

淮南吳牲著

○上勤學好問八月御經筵後每三日出講內閣講官預於文華殿外直房候駕出坐殿後上曰先生每來諸臣入叩頭行禮畢講官以次進講一日講夫子當路於齊章上問諸閣臣曰孟子欲以齊王孔子却不然吾其為東周聖賢不同若此牲對言聖賢無不同總以濟世安民為心孔子去周五百餘年王迹雖熄天命未改東周猶可為也孟子去周七百餘年僅守府空名權分七國日以

戰爭為事小民憔悴於虐政不啻饑渴倒懸策士縱橫爭務富强
喜談管晏故孟子力持仁義取法湯武望天下之君發政施仁救
民水火而行王政也見齊宣王足用為善反覆開導不忍一牛推
之足王欲其加恩百姓甚至好貨好色好勇皆引之與百姓相同
一怒而安天下之民故曰王如用子豈徒齊民安天下之民舉安
又曰饑者易為食渴者易為飲行仁政而王猶解倒懸也其慝慝
於濟世安民如此其心亦孔子之心也孟子稱說伊尹伊尹五就
湯五就桀其初心豈不欲輔桀致治及見桀不可輔卒就湯伐夏

救民其言曰子天民之先覺者也子將以斯道覺斯民也有匹夫
匹婦不被堯舜之澤者若已推而內之溝中其自任以天下之重
如此伊尹之樂堯舜孟子之說湯武其濟世安民之心一而已矣
上曰先生說得是行禮畢出蔣入公謂子曰今日暢聞快論

○上召對九卿科道於平臺面諭各官邇來賊寇愈熾朝政多舛
皆繇諸臣比周結黨壅蔽耳目不得上聞以後務各省改大小文
武官但有請對者赴會極門報名次早候對退而給事中姜埰上
疏內言朋黨之說皆小人欲壅蔽人主耳目故為此言近日二十

四氣之謠奸邪捏造以傾正類不可不察臣不知陛下所稱壅蔽何所見而云然也上大怒以為忤旨詰責子進朝時忽聞召錦衣衛官甚急于語首輔曰此必廷杖姜給諫也速宜進揭申救首輔曰徐之俟確乃可子曰旨下即杖揭無及矣豈可坐視給諫血濺闕廷耶首輔方具稿而旨已下果廷杖矣揭入無濟也次日上召內閣臣姓奏言姜塚廷杖待斃古人有言豈可貽老親憂塚有父母年老可憫復下錦衣衛獄萬一不起陛下負殺諫臣名臣等俱應待罪乞移刑部幸甚首輔等俱申救乃送刑部擬罪臣姓偕臣

景昉復奏姜塚疏內小人以朋黨之說壅蔽人主乃宋臣歐陽修曾有論著言之痛切臣等未敢卜先即聞小人造言二十四氣兩臣名亦與其中以匿名文書不必窮詰今塚言及此臣等不敢隱默二十四氣或即朋黨之意而立名新奇易炫聽聞臣等蒙聖明簡在所司不過稟擬及召對奏聞而已擬旨皆取決聖裁奏對皆仰承清問未嘗譽一人毀一人顛倒一事上所洞鑒朋黨何為臣等在天啟朝魏崔欲傾陷不肯依附之人皆誣以朋黨魏崔誅而上所錄用者即不依附魏崔魏崔所誣為朋黨之人也今非魏崔

時小人所造復此言臣等竊抱憂惶上曰匿名文書朕豈不知為
奸人誣造卿等所奏朕知道了不必疑慮臣姓臣景昉叩頭退

○上召對九卿科道等官於皇極門都察院左都御史劉宗周奏
言朝廷待言官有體其言是採納之即有不當亦宜優容不則降
斥之而已今姜埰不知所言當否陛下廷杖詔獄此非所以待言
官也上怒曰劉宗周黨救候旨處分僉都御史金光辰奏言都察
院激濁揚清紀綱之地自陛下調用劉宗周宗周正己率屬大著
風采諸御史懍懍飭法都察院最為得人望賜優容上益怒曰金

光辰亦候處光辰曰甯處臣不可不留宗周臣姓奏言宗周清直
陛下素所鑒知起之廢籍畀以臺綱倚任甚重今以申救言官致
觸聖怒然申救言官亦自古大臣嘗事非有黨也望霽威寬怒首
輔等皆救上不憚而退至勤政殿手諭責宗周悞拗偏迂着革職
刑部議罪光辰降二級調外命內豎捧出與諸閣臣看看完傳出
施行子讀未竟歎曰朝廷待老臣安可如此首輔欲付手諭內豎
子力持曰上以視閣臣閣臣寂無一言何云輔拂古人封還詔勅
今不可求見持奏耶首輔語內豎曰諸閣臣願進見面奏上召入

各奏未竟上意稍和諭曰諭已發乎首輔持諭進曰尚未發願奏明取旨而後敢發也上以手筆抹出刑部擬罪一語曰依先生每奏少寬之臣姓退而歎曰明旨主未嘗不可與忠言也襲職有關仲山甫補之愧矣愧矣先是劉宗周有疏條陳臺事子擬旨飭行上改票子奏言宗周為總憲振飭紀綱是其職掌初入臺拜疏而御駁之何以提挈諸御史上曰祖宗憲約具存何更條陳為姑念初到免改擬可耳

○是時錦衣衛弊竇多端臣姓言前有上疏者言衛役冗雜宜加清釐已擬旨兵部察奏如實當賜處分首輔言近日緹騎差出拿人需嚇尤橫朝廷待人旨下不敢不待罪即途遠撫按拿解可也不必又差緹騎上然之次輔陳演素與金吾交密洩前語時又有演門生欲擁戴演者傾首輔併及子矣

○行人司副熊開元請對面糾首輔持論侃侃又請屏諸輔臣而後盡言上曰所言正當與輔臣共聞何屏為疑其挾私下錦衣衛打問文致其詞獄具上不釋以列款送閣曰誣言朕不欲留中也子勸首輔曰開元朴直其他機謀非所知仍宜自引咎而請釋言

者首輔不能從

○兵科給事中曹良直疏糾駱養性交結不法狀上留中不發票養性疑良直晉人出子門下銜恨益深

○臣姓於上前奏上我朝缺典有三建文宜補諡號景泰宜建廟號靖難諸忠臣宜諡錄上曰朕亦知之但祖宗遺事未便驟為更正耳姓言繼志述不失為達孝上曰俟徐議○九月上宴內閣兵部戎政諸臣於明德殿黑字帖傳衛錦衣衛備馬內閣諸輔臣騎馬從西海池過玉虹橋之北可八九里上已御殿矣召諸臣入看

內員新鑄鎗礮試放畢兵部署部事左侍郎馮元颺奏練兵機宜上與相議良久賜宴餽饌皆出宮禁諸臣宴畢叩頭謝恩而出益異數云

○考選科道吏部都察院職掌也上疑部院徇私召對候考各官上御皇極門門東西列桌席置紙墨其命上內閣部院坐諸臣叩頭謝上進各官問其以時事揆名奏對觀其言論可采俱令摘錄上傾聽手書不輟對畢各官退鄭三俊劉宗周面奏凡人才品外覈官評內采輿論尚恐不確今片畧天威之下有才品清卓而口

情言卷四
九
訥亦有才品卑劣而便佞者何以裁定流品且考選科道從來是部議院掌職如果徇私不當當加加罪斥乃至勞陛下宵旰臣等為溺職矣上不憚責以偏執子深服兩公言正可著廟廊以不能匡正為媿考選雖召對仍諭內閣具揭次第分別科道等官恭請上裁

○癸未正月二日大風晝晦次晨稍霽具揭引咎又三日午後中書云各殿春烟起疑有火災子與諸公出看見各殿及門春上冉冉若炊烟而微淡久之乃息亦異災云

○禮部儀制司郎中吳來之昌時欲改吏部文選郎謁子曰鄭冢宰初入部上未親信且與首輔方圓鑿衲願入文選於用人之際少佐半臂獲上信友此其機也子曰鄭公處君友之間非他人所能周旋儀郎清曹久之亦得異擢子名甚盛而處劇要之地又與首輔往來易生嫌疑恐盛名難副則平生望損矣來之拂然去
○來之改選郎出首輔意到司即欲例轉臺省往例臺二省一來之欲破格用十餘人一日謂子曰惟此者可為鄭太宰結知主上地子曰不然大臣以休容為度當保全言路子甫入而破例行之

怨不獨歸子鄭公賢者黜斥或當但此端一開後此而不肖者驅逐言官必借鄭公為口實恐忠直之士亦皆寒心來之不聽已見鄭公復言其不可鄭公初亦然之後見選郎意堅第於呈牘中留二人然已臺轉五人省轉三人倍往例矣旨下臺省大噪疏攻來之且以議太宰者怨謗盈朝太宰首輔次第罷來之竟及於禍

○子簡閱隆萬間先輩疏揭稿簿猶有古人執奏之風子通籍後見邸抄葉臺山相公疏揭皆發抄臺山精敏有幹濟近代之姚崇也崇禎朝韓象雲曠水強近正而才不足以濟用溫員嶠入閣倡

言密勿之地不宜宣洩有後有揭無疏不得發抄至密揭或出手書併不存錄閣簿矣即如會推用人上有點有不點外廷謂出自聖裁不知其為首輔揭帖也其他機宜皆然在公忠者或可少効補救而怙權貪欺者非諛則誣上壅聰明下酬恩怨密揭之貽禍甚大宋李文靖明劉忠宣皆不肯用密揭可法也

○三月湖廣塘報李賊攻陷襄陽承天失守上召對隕涕諭內閣諸臣曰朕不德憂及陵寢因責臣下調度失宜臣等叩頭引罪次日上復召對諭臣姓曰自楊嗣昌死後督師無人致有今日卿曩

歷巖疆可往湖廣督師以圖恢復臣姓奏言逆賊不道震驚陵園臣何敢惜其死願陛下發勁兵假便宜統之而南必殲厥罪渠以雪國憤誓不與此賊共戴天日上曰卿條奏來看退而具疏言李賊蹂踐兩河以後心膽橫張聚眾至數千萬我兵怯弱未敢一矢加遺總鎮左良玉退避漢陽兵無紀律不肯用命殺賊而乘亂肆掠民間畏之反甚於賊臣此行必得精兵三萬敢戰之將統之南征出奇制勝可以恢復襄承清掃陵園南京豐邑重地恐賊窺伺亦當兼顧兩河責秦督孫傳庭相援出師則南北夾勦之勢成釜

魚檻獸擒之必矣王師貴出萬全仍乞召集廷臣謀議恐臣智慮有限疏入不遠下臣具揭請面對上御文昭閣召臣姓入上曰昨先生疏欲需多兵豈能猝集南京隔遠似不必退守臣吳姓奏言昨臣所以請精兵戰將者竊有深意左良玉跋扈不用命當年閣部督師十檄徵兵一旅不發近日河南總督羸卒數十僅充輿從臣即憑藉國靈不過仍如閣部而良玉退踞江漢更有甚於河南方厓內憂遑禦外侮若臣督領兵將結以恩信進可追勦強寇退可駕馭驕帥誠出萬全之策如僅張空拳節制不行徒損威重何益

阻征南京陵寢在焉從襄陽順流而下窺伺甚易此根本大慮且臣奉命督師原為承天報陷陵園重大出師南征敢不兼顧非退守也次輔陳演言督師出則督撫之兵皆其兵也臣姓奏言次輔讀書中秘未諳軍旅臣之請兵正為督撫無兵耳秦督新集烏合之眾防禦尚憂不足且遠隔數千里之外豈能猝應河南總督止左良玉撥兵數十護從併無一卒豫撫自開封淪陷標營千餘見屯河北楚撫失守承襄兵盡死逃督撫何兵可為臣調度之兵乎兵者國之大事臣敢惜餘生不以上告君父使臣出而仰面強鎮

束手待賊然後呼籲臣侍帷幄咫尺尚不得請况在行間事機一失不可收拾禍有不忍言者上意始釋曰先生說的是但兵難多集姑先發一萬隨行乃命兵部尚書張國維議兵將孰可調者國維以唐通兵七千馬科二千京營一千應復以他故不能猝集上曰姑俟兵集啟行未晚也

○上召諸閣臣出本示之曰此秦督出兵疏也何如臣姓覽畢奏言兵凶戰危而孫傳庭易言之且矜其強勇謂不出一月賊可掃蕩傳庭新集之兵訓練未久思信無聞出抗數十萬方張之寇豈

易得志又謂間諜密謀兵至內應臣竊憂焉賊皆秦人結連日久內應之謀果否得當上曰何謂也臣姓言傳庭軍多烏集所製衣甲衣器具皆斂之民間秦父老怨之至骨傳庭復不結以恩信而以不教民戰豈能動其親上死長之義乎一往之氣難以持久間諜恐墮賊計一蹟則立見潰散深為可憂上曰臨事而懼好謀而成先生見良是但賊橫已極秦督奮勇直前亦不可少臣姓乃不敢言

○五月初四日姓具揭集兵陳演修卻阻之揭留唐通兵已得旨

御批姓揭曰着兵部另議徵調姓言唐通兵七千已留近馬科稟稱所領二千皆分自各營各營復調去實無一兵乃請點集京營兵將於月望啟行奉有俞旨至望日出手諭責臣姓延緩今就近加孫傳庭以督師銜命之討賊閣臣不必行且留佐理姓惶懼待罪願備戍伍之卒為將士前驅奉旨覽奏具見恪慎還着入閣佐理欽此姓再疏請罪上令致仕先是秦督塘報左良玉兵駐武昌賊船遇漢陽為左兵追殺復退云上密遣中貴齎金幣往營諭之未幾湖廣撫臣按疏至併無追殺有功情狀姓具揭言左鎮坐視

承襄之陷退避湖南方懷疑懼而上復遣內臣往若追殺報虛疑懼愈甚乞陛下暫且停遣俟察實命兵部差官照嘗賞齎為安御批左良玉之退亦繇地方官不為措給糧餉朕故加意激勸留此一校勁兵助先生徂征半臂矣耳中使已發不及停矣上慙慙汪意若此不啻家人父子而命忽中止或云陳演密揭即借前上諭秦督奮勇直前為言謂孫傳庭見統大兵堪任督勦不必又遣閣臣手諭半用密揭語云牲退而秦督孫傳庭督師矣然猶延至八月方出關賊誘兵深入伏發兵潰不可收拾孫傳庭或死或遁卒

無可確報賊乘勝入關據有陝西一言僨事傷哉

○五月張獻忠破武昌焚掠而去七月報至京次輔陳演已代周延儒為首輔構牲以自文前專任秦督之非上聞武昌破怒甚適科道糾參舊首輔不已遣錦衣衛官催令赴京候旨遂併逮牲矣○子以七月十二日抵里門病瘥臥不能起八月二十一日始聞報緹騎已到郡城子抱病怡然就道曰時事破壞至此我輩當任其咎兒女牽衣泣留一日子曰君命也不可以遲自審平生硜拙無他罪狀昨督師所議兵食大計皆有當聖心今不過為小人所

構借武昌失陷為題耳無憂也

○子至淮上金吾張昂來見云上遣官時諭堂官駱養性曰內閣大臣自有體到京候旨亦在私寓可也九月初一日北行二十九日到京具二疏一陳請兵討賊根絲一席藁待罪內言賊破武昌時臣尚在京師失陷地方罪自有歸總之疎諳寡謀不能運籌決勝媿死無地旨曰這所奏知道了姑念未到地方着刑部速議擬具奏嗟乎聖心洞然明如日月彼構牲者文致以失陷封疆之罪豈能逃天鑒哉

○崇禎十六年九月南京兵部尚書史可法上疏內言皇上以堯舜之質勵精十有六年而未能致堯舜之治則向來之輔弼非人也近且隆以優禮體以至情千古希逢一時傳美若猶營私誤國畏事辜恩臣子少有良心備不共為痛憤然而人品邪正心術公私原未可同日而語也臣初任陝西西安府推官值革職輔臣吳牲為巡按清方正直精敏忠勤臣敬服其人奉為師範牲賑秦撫晉素有重名日者奉命督師遷延時日但牲於拜命之時即將布置情形移書於臣與鳳督應皖諸撫臣不一而足又慮鎮臣左良

玉之不為用也即委良玉差官張鎮遠持檄慰勉之身雖依於闕
下心已徧於行間此皆一一可察非臣敢為飾說也至於慮將帥
之跋扈而力請多兵軍旅未集猝難啟行亦非得已察督師楚撫
原各有兵萬餘自左鎮倡義勤王盡為收去江督袁繼成屢次索
取僅發三百餘人而楚撫王聚奎則求一名不得也若輔臣視師
兵力不厚呼之不應調之不前豈不損軍威而辱國體此亦皆一
一可察非臣敢為飾說也臣於六月間晤姓於淮上責以君恩未
報相對欷歔一聞欽使來催扶病即往蓋生平清望既為海內所

推而憂國熱腸亦其居恆自矢一時之偶誤其罪或可原向後之
自贖其效尚可責也臣敢以身保之臣生長京師絕無依傍憂心
國卹久切捐糜使一念不可對聖明一言不可公海內即或顯蒙
恩宥亦當幽伏神誅區區狗馬之誠太祖高皇帝在天之靈實為
鑒察疏入留中

○孫傳庭敗潰之後賊踞西安勢甚猖獗或有言公言不幸而驗
矣上追憶公言行當復用公乎子曰不然上英主也恨討賊無人
恐加重遣未幾刑部以邊遠擬御批發雲南金齒衛充軍終身即

日啟行牲仰荷不殺之恩僅存髮齒皆上賜也子奉旨抵里拜辭
先墓遂執及南行至湖口船道斷絕皆云左兵肆掠湖廣郡邑已
生荆棘不可往矣江督袁繼成止子曰且煩廬阜匡君暫作主人
俟寇靖舟通鼓柁未晚也乃寓南康之廬水園


○四月袁臨侯遺子札云頃見二月邸抄上諭兵部察舊輔吳諸
章疏進覽上思公言矣賊渡河掠晉上命內閣出督師御送至大
明門某非能辦此者山中抱膝夙夜圖迴匡廬松雲未可巢也


○會福邸在南都詔凡閣部大臣遣戍者赦罪復原官子拜疏稱
謝罪兼陳舊輔用孫傳庭阻兵誤國之繇吏部尚書張慎言疏薦
奉旨召見為誠意劉孔昭所阻子堅卧懇請奉允卿嘉遜之旨子
乃歸里病卧於潭谿西村肯甲申七月也

憶言卷之四

憶記卷之四

吳郡朱氏





• 24399